

11
1774
10



應輪石火百年身遺軀空悲古逸民不見蒼梧二姚返蹇修

我欲託靈均

姚瑚古香

姚虎臣

爾宋樓藏書志古逸民先生集鮑以文手跋曰是集藏書家未有蓄之者吾友錢唐姚君古香得之親串亂帙中好事者因爭傳錄未幾古香暴卒使先一年此書無從蹤跡矣古香名瑚藏書多祕冊與予交最善卒時年止三十餘嘉慶甲戌六月通介叟時年八十有七士禮居藏書題跋記梅花百詠傳本絕少此本出杭人姚虎臣家陳仲魚爲余購者今虎臣已故仲魚亦旋舊里好古之友無一二入誰爲之助余發憤邪

青桂連蜷覆畫檐隔窗碧色上牙籤流光明月還如昨不見



1774
10

懷民與子瞻

郁禮佩先

藏書五

鮑廷博庶齋老學叢談跋右老學叢談楷書精整出自錢唐汪西亭氏吾友郁君潛亭所貽也 又附記郁君名禮字佩先潛亭其自號也錢唐諸生家世素封儲書充詔潛亭又增益所未備成鉅觀焉時小山堂趙氏藏書業已散佚所餘殘帙尚多異本君悉力購之家在城東去厲徵君樊榭山房不一里傳錄其祕冊尤多徵君歿其家出所著遼史拾遺手彙君以四十金購焉中間缺五十紙百計求之不得一日余步至青雲街見拾字僧肩廢紙兩巨籠檢視之皆厲氏所棄徵君平日掌錄遼史遺事在焉亟市以歸紛如亂絲一一爲之整理適符所缺若有鬼物陰相之

者事亦奇矣君恂恂儒雅尤與子瞻無三日不相過過必挾書而來借書以去雖寒暑風雨不爲少間藏書東嘯軒軒額董香光所書庭前古桂二樹相傳明萬厯閒所植交柯接葉清陰覆檐室中牙籤萬軸都成碧色君馮几校錄晨夕不休經其庭間如也花時每招余信宿其中香鑪茗椀婆婆竟日更深月上兩人徘徊花影下彷彿東坡與張懷民承天寺之游自予移家烏戍遂無復有此樂矣君棄世不數年鄴架曹倉漸就零落主人避客塵榻空懸想惟舊時明月流光碧樹閒耳 嚴誠九月朔日郁佩先招集東嘯軒看桂分韻得軒字連蜷青桂樹涼影滿東軒半畝勢疑壓三秋香始繁

為慕一廛藏百宋更移十架度千元生兒卽以周官字俾守
楹書比孝轅吳騫槎客 子壽陽虞臣 孫之涪鱸鄉 姪昂駒醒園 春煦子撰

海昌備志吳騫字槎客號兔牀家新倉里篤嗜典籍遇善
本傾囊購之弗惜所得不下五萬卷築拜經樓藏之晨夕
坐樓中展誦摩抄非同志不得登也得宋本咸淳臨安志
九十一卷乾道志三卷淳祐志六卷刻一印曰臨安志百
卷人家其風致如此子壽照字南輝號小尹乾隆丙午舉
鄉試壽陽字虞臣槎客以宋槧東坡先生集授之因自號
蘇閣取拜經樓書有題跋者手錄成帙為題跋記虞臣子
之涪諸生亦能守遺籍校讀不倦海昌百年來藏書家若
前步橋許氏之惇敘樓今遺籍蕩然樓亦毀矣胡陳村胡

氏華鄂堂所藏僅有存者獨拜經樓完好無恙賢子孫善
守之效也昌熾案兔牀先生一字葵里之涪號鱸鄉 虞
臣題東坡先生鹽官縣絕句殘碑云扁舟載過蘇閣中醜
鵠芸編曰為伍自注云家君得宋槧百家注東坡先生集
因名藏書處曰蘇閣蓋先以蘇詩名其閣繼卽以閣名字
其子也 東湖叢記黃蕘圃主政百宋一廛吳兔牀明經
以千元十架相敵故老風流令聞者色飛眉舞昌熾案拜
經十架諸家所記皆作插架之架獨蕘圃席上輔談跋云
余藏書所曰百宋一廛海昌吳植客聞之卽自題其居曰
千元十駕謂千部元板遂及百部之宋板如駑馬十駕耳
潛研老人十駕齋養新錄卽此十駕之義其字作駕且從

而爲之辭蕘翁同時同好不知何以傳聞致譌也 拜經樓藏書題跋記周禮宋刻二十卷陳簡莊跋云槎客得此書時適生次君虞臣故其小字曰周官 又管庭芬跋兔牀先生祖籍休甯流寓尖山之陽博綜好古纂述宏富拜經樓之藏弄足與道古得樹二家後先鼎峙嘉慶癸酉先生年八十一下世蘇閣父子保守遺跡累世不怠亦自來藏書家所難能也 暴書雜記吳春煦字子撰兔牀先生之姪孺染家學校讎極精密其兄醒園昂駒亦好古籍錦題玉躐故家藏一見分明認舊裝紅豆再傳弟子列白蓮小築丈人行 朱邦衡秋厓 姪與文游 余蕭客仲林 士禮居題跋記經典釋文同郡朱秋厓爲余言小阮文游

有影宋鈔本昌熾案文游卽奐字也秋崖爲余蕭客高弟其傳錄國語惠校本自署小門生朱邦衡蓋以仲林爲松厓弟子也蕘翁太平御覽跋云朱丈文游與惠徵君棟爲莫逆交又顧千里諸書跋尾亦多稱文游爲丈則其輩行雖較秋崖爲幼而其齒必較長矣 顧廣圻題清河書畫舫常熟錢遵王毛子晉席玉炤陸敕先馮定遠曹彬侯各家書散出乾隆年間滋蘭堂主人朱文游三丈白堤老書賈錢聽默視裝訂籤題根腳上字便曉屬某家某人之物又張月霄書目序文游晚失厥嗣手斥萬籤較販鬻家一出入同歸於盡 吳門補乘余蕭客字仲林年十五通九經聞有異書必假鈔錄同邑朱奐藏書甲吳中館之

滋蘭堂因得博覽手一編終夜不寢遂患目構一室無隱
戶上穴一方以通天光設修几書冊鱗次潛心研究爲古
經解鉤沈 先正事略蕭客別字古農讀書弗輟致目疾
人稱盲先生 昌熾案余見邦衡手錄述古堂書目題乾
隆庚子錄於白蓮里之靜怡小築

識得單行吳志本不憂善眩等黎軒可憂可喜斯文種一老
慙遺天壤間 周錫瓚仲漣

昌熾案仲漣先生住閩門外馬鋪橋一號漪塘又號香巖
居士 士禮居題跋記萃古齋送來吳志宋槧本始猶惜
是未全之書及閱其目錄牒文自一卷至十卷分爲上秩
十一卷至二十卷分爲下秩并載中書門下牒一通乃知

此書非不全者汲古述古兩家書目皆載有吳志二十卷
特世人不知耳明日訪海甯陳君仲魚借其津逮舫同至
水月亭訪周丈香巖香巖識古書爲吾儕巨擘曰此爲專
刻無疑未見書之必歸于讀未見書齋何巧乃爾相與談
笑而別 又姚少監文集有翰林國史院官書朱印香巖
所得壬申五月十一日爲余五十賤辰以是書贈札云尙
是宋版宋印且有元官印可寶聊以當祝香巖喜藏書今
年已七十外知余有同嗜蹤跡甚密余每購一書必往借
所藏祕本證之二十年來可爲同志之友抱沖壽階先後
下世唯周丈與余一老一艾孜孜於故紙堆中尋活計可
喜亦可憂也又云己卯秋重展去香巖歿五月餘矣昌熾

案己卯爲嘉慶二十四年上距壬申又七年是香巖之卒當逾八十矣 又開天遺事跋香巖季子謝庵出所著羣書綴述相質萃元明以來人著述爲目錄以續貴與經籍考子晉之有斧季相去當不遠也 劉禧延研六齋筆記跋吾吳藏書之富以朱氏黃氏爲最楓江周氏足與之埒研六居士謝盦自其尊人漪塘已癖好聚書以故家多善本錢辛楣段茂堂諸公常過從借閱至謝盦好之彌篤丹黃校勘無閒寒暑家且中落宋元槧本及精鈔祕本漸爲豪者餌去而餘籍尙夥所纂羣書綴述一百四十卷薈萃諸家論跋儲藏家一大掌錄也此則隨時筆記然所載已多罕見本宋君彩若近與有連以綴述一書工費稍鉅筆

記卷帙無多尙易爲力先刻以傳庶謝盦一生輯錄之勤不至盡泯而宋君惓惓雅意已足多矣 昌熾案謝庵名無攷蕘翁跋學齋佔畢又云香巖作古書多分散兒孫藉先世寶藏聲名挾冊索重直然則香巖諸子不能盡賢其遺書亦卽散也

雞靡豕零各有須癡愚未必竟癡愚充閭三館讎書日失卻

智珠說世珠

願階升步巖子礎肇聲

子應昌桐井

願潘方水

潘

何堂顧步巖小傳君諱階升字步巖家故素封獨無所慕惟以圖籍法書名畫自娛樂書齋之內縹緗插架者萬餘卷遇一編實能挹其精華并識其刊刻鈔錄收藏所自賈客挾冊至門者君爲審眞贗品高下判若黑白無不相顧

愕眙以去和叔陳君病宋史之繁而臨川舊本及祥符王
損仲彙本皆不傳也欲重刪修以成一家言而苦考證之
書不具備君按其目所徵求者悉舉畀之其通懷樂易如
此年五十患痰厥來年八月遂以死子韻應麟 顧廣圻
後序何寓庸堂所作顧君小傳藏書言之尙略吾徵諸所
聞則長洲張先生思孝每稱近世藏書當數義門爲吾郡
一宗又稱君簿錄之學深造義門堂奧有類繼別考鑿密
而包羅廣出同時諸家上君歿家中落書佚出前卅年許
吾從兄之達頗收得咸精確祕善無一俗木 錢大昕顧
桐井墓志銘君諱應昌殿舍字也桐井號也行第五又自
號五癡先世自金陵遷吳五傳至國本明季貢生私諡貞

孝先生者君之高祖也國學生階升其考也君生於雍正
乙卯卒年六十有二有子二人長蒨而縻季也昌熾案純
卽南雅先生先生達而家書盡散矣 士禮居題跋記會
稽三賦余所見三本一得諸顧八愚家一見諸顧五癡家
八愚五癡爲昆仲 又白氏文集跋東城顧五癡家藏書
甚富知余好之篤雖一鱗片甲亦自侈爲奇寶因出破書
一束指示余曰此絳雲餘燼也余開卷知是宋刻白氏文
集述古堂中物也卷中燒痕尙在通冊又似經水溼天下
奇書何其厄於水火之甚邪 昌熾案潛研銘五癡名應
昌而何堂所作傳稱步巖二子曰韻應麟抵牾不合豈韻
一名應昌邪又案蕘翁呂衡州集跋云余得諸顧五癡家

又云得諸碧鳳坊顧氏是五癡嘗居碧鳳坊矣其跋湘山野錄乃云混堂巷顧五癡家有毛斧季校本蓋五癡先居碧鳳坊後遷混堂巷今其後裔猶居舊宅余在海甯查翼甫孝廉處見舊鈔翠寒集每葉欄外有善耕顧氏文房六字前有顧肇聲讀書記肇聲名樾官鹽山令改浦城沈冠雲有送顧浦城序見果堂集又有樾父顧方水墓表云君諱浦字方水祖國本縣學生据潛研銘國本三傳至階升則方水爲其從父而肇聲昆弟行也

道廣平生似太邱雲煙流落借書郵綠窗子墨同珍重細字黏籤在上頭

丁杰升衢 錢馥廣伯

翁方綱丁小正傳丁杰字升衢號小山又號小正浙江歸

安人乾隆辛丑進士官甯波府學教授嘉慶十二年二月卒年七十子授經傳經皆能世其家學君北學齋在京師宣南坊與子對門而居無日不相過從共几展卷審正罅漏每竟一編校籤細字壓黏倍其原書皆目光髯影栩栩飛動處所定桂未谷詩集有客不識丁杰姓名口占一首云木火相扶信五行遂教雁塔表新名丁因有尾無人識劉向原來是更生自注歸安丁錦鴻久困場屋日者占運謂須木火相扶因改今名果登第許宗彥丁教授傳教授在都十年聚書至數千卷手寫者十二三爲學長於校讎得一書必審定句讀博稽他本同異用小紙反覆細書孫侍御嘗謂曰君書頗不易讀遇風紙輒四散不可詮

次李何 海昌備志錢馥字廣伯號幔亭世居路仲里嘗
取濂溪詩意自號綠窗於是遠近以綠窗布衣目之自題
所居曰小學齋年甫四十而歿門人錢唐邵書稼爲訂遺
稿 拜經樓藏書題跋歎堂集古錄先君子跋云丁升衢
進士見而借校原本卒未見歸也踰年詢諸丁君乃從盧
弓父學士求此本以還予開卷視之所補序跋及校字皆
依子筆而書則非予原本蓋升衢交道最廣嗜古尤癖予
之原本展轉傳錄不知落誰氏之手矣 又廣韻五卷錢
綠窗處士手校 又字鑑二冊錢綠窗處士校本先君子
識後云廣伯生平精究小學所校正字鑑及郭氏汗簡予
昔嘗從之借鈔今廣伯既歿遺書盡散予偶見茗賈攜示

數種皆手澤宛然每一披對不禁泫然 又樂記逸篇丁
小疋跋題丙午二月記於巖寺鎮之鷗先草閣

舊槧書沿唐諱筆古銅範自蜀中鑄新篁大樹何須問霄漢
胎禽總列仙 張燕昌文魚 族廷濟叔未

張廷濟桂馨堂集感逝詩文魚兄名燕昌字芑堂手有魚
文因號文魚又號金粟山人海鹽人祖居大樹村與篁里
近傳是同族而譜系不可攷乾隆丁酉科優貢生嘉慶丙
辰薦舉孝廉方正甲戌卒年七十七詩云獨有昂藏鶴風
姿似列仙論文金石契話舊孝廉船 又篁里紀事詩江
村十里徧篁管是處天開水竹鄉多少趁墟筠徑裏新行
里合號新篁 燕昌金粟箋說藏經都宋人書亦有沿唐

諱缺筆者如愍偏旁民字缺末筆余居京師嘗以一本贈北平翁學士學士賦詩爲報云愍字尙沿唐諱筆我嘗證以宋槧書 金楷贈張文魚徵君詩金粟山中叟蕭閒話古權書搜秦火贖篆補禹碑殘 士禮居藏書題跋記十一月朔往候海鹽張芑塘芑塘愛古年已七旬所見古書甚多與長塘鮑淥飲相友善 東湖叢記新篁張叔未丈藏有古銅一片上楷書反刻易奇而法詩正而葩春秋謹嚴左氏浮誇十六字凡四行四字爲一行未翁題爲書範有自跋云此初刊書時鑿銅爲式以頒示匠者之物也韓文始鑄於孟蜀歐陽子書後云文字刻畫頗精於今世行本則此爲孟蜀勅刊韓集時鑿銅爲式可知也 莫氏宋

元舊本書經眼錄皇朝仕學規範四十卷宋清熙本有清儀閣張叔未廷濟印叔未題其首曰乾隆時武陟令查宣門開所珍貽者嘉慶時余從宣翁之子棗庵秀才購得道光二十五年乙巳七月二十日嘉興竹田里七十八歲老者張廷濟叔未甫

恍有金絲孔壁聞青樞積雨潤苔紋牙籤已溢章邱笥何論

琳琅金薤文

孔繼涵補苴

翁方綱孔君墓志銘君諱繼涵字體生一字補孟號洪谷曲阜人至聖六十九世孫乾隆辛卯進士官戶部主事告歸養母歿年四十五君雅志稽古於天文地志經學字義算數之書無不博綜官京師七年所手校者數千百帙集

漢唐以來金石刻千餘種悉攷覈其事與經義史志相比
附遇藏書家罕傳之本必校刊付鈔以廣其傳所著名紅
欄書屋集 又過紅谷齋同觀石鼓文舊拓本積雨青櫺
潤苔花似古文我來循孔壁不屑較秦斤自注青櫺紅谷
齋名 又送孔洪谷農部請養歸曲阜敏捷鈔書手優閑
奉母身歸當仍壯歲行及小陽春日下編初葺章邱筭更
新牙籤精點勘勿笑北方人自注朱竹垞云李中麓所儲
書籤帙點勘甚精北方學者能得斯趣殆無多人今洪谷
鈔藏之富已過中麓矣昌熾案余在嶺嶠見郎亭侍郎所
得宋元人集如周紫芸太倉梯米集陳基夷白集凡數十
種皆微波榭鈔本洪谷先生以朱筆點校間有跋語知覃

溪之言爲不虛也

集注標題五百家此風作俑自麻沙東坡居士如相見捧腹
難禁齟齬哇 馮應榴星實 弟集梧軒圃

嘉興府志桐鄉馮應榴字星實浩長子乾隆辛未進士江
西布政使 又馮集梧號鷺庭浩少子乾隆辛丑進士授
編修 湖海詩傳集梧字軒圃有貯雲居橐 蒲褐山房
詩話鷺庭多藏書精校刊嘗刻元豐九域志杜樊川詩注
惠定宇後漢書補注 潛研堂文集星實先生沈酣於東
坡詩者有年又得宋槧五百家注元槧百家注舊本參以
施注殘本稽其同異而辨正之昌熾案唐杜韓柳集亦有
五百家注皆坊肆射利者所爲不足重也翁覃溪復初齋

集有夢蘇艸堂歌爲馮星石少卿賦張叔未桂馨堂集有馮星實夢蘇艸堂圖詩爲金芸舫森賦 拜經樓藏書題跋記馮星實太史補注蘇詩屬其戚項根堂從余借宋刻王狀元蘇詩不意爲中閣故馮刊所引王注亦多不全未免遺憾

槐市塵封有敝廬半生飽食武昌魚歸來嘆喑摩昏眼充棟雲煙付太虛 吳翊鳳伊仲

道光蘇州府志吳翊鳳字伊仲諸生於學無所不窺卒年七十八中歲應湖南巡撫姜晟之聘繼主瀏陽南臺書院戴延年捕沙錄枚庵名翊鳳吳縣人酷嗜異書無力購致往往從人借得露鈔雪纂目爲之管 又秋燈叢話梅

葦貧而工詩閒留心設色余贈詩云兒童報道晨煙斷餘事青山換米來蓋實錄也老屋一椽僅蔽風雨所居干將里 吳壽暘贈枚庵詩槐市幽棲比鶴巢高風幾爲俗情消自注先生居吳之槐樹街昌熾案槐樹巷卽在干將坊實一地 拜經樓藏書題跋記伊仲本休甯商山人僑居吳郡家貧而好書與朱文游爲莫逆交手鈔祕冊極多子至金閭必爲留連日夕得佳本輒互相傳錄後應姜度香中丞之辟挈家入楚郵筒不接者十載聞其書亦皆散失矣 王芑孫題吳枚庵明經借書圖詩君昔富搜羅藏家所爭詫偶食武昌魚儵然皆羽化晚歸空四壁往夢付嘆喑雖無千金市幸可一瓶藉久亾憶之頻驟得喜如乍昏

流書五
登
鐙摩老眼積漸仍滿架圖成應自哂茲身亦傳舍 黃丕
烈洞天清祿集跋枚庵久客楚中舊藏書籍寄貯親友所
者半皆散逸 又文房四譜跋枚庵久而不歸故親友無
忌憚而爲此也 愛日精廬藏書志游記續編有鮑以文
跋曰枚庵書法秀逸手書祕冊幾及千卷今之錢馨室也
一旦化爲煙雲其歸也益有大難爲懷者矣 昌熾案枚
庵子號晉齋見士禮居沈下賢文集跋其藏書印一曰枚
庵流覽所及一曰吳胡鳳家藏文苑

商瞿一經可傳子先生雖死猶不死道家何處有蓬萊卽在
蘇門百泉裏 汪中容甫 子喜荀

錢儀吉汪孝子墓表江都汪孝子諱一元字兆初縣學增

廣生父良澤病卒明年又遭母喬憂遂以毀卒妻鄒煩擗
苛苑教成其子中鬱爲通儒有孫喜孫惇至勤學 劉逢
祿禮堂授經圖記子友汪子孟慈旣撰次其先人述學之
書而復屬屠琴陽氏系之以授經圖且哀而言曰喜孫年
六歲先人寫定皇象本急就篇管子弟子職教授於禮堂
嘗謂友人商瞿生子一經可遺惜旦暮入地不及見其成
立耳 又云先生晚而得子慮爲俗學所囿乃自次其藏
書數萬卷畀之 楹書隅錄宋本毛詩先公於己酉購之
揚州汪容甫先生家 又宋巾箱本春秋經傳集解向爲
青浦王德甫先生所藏後歸揚州汪孟慈太守道光己酉
先公於太守之子延熙處得之有周玉齋金漢石之館喜

孫校本汪延熙印諸朱記 又宋本周禮十二卷有江都汪氏問禮堂收藏印汪大喜孫喜孫祕笈汪延熙印汪介徽印諸朱記 昌熾案孟慈先生後改名喜荀曾見陳碩父先生朋舊尺牘一冊中有先生書十餘通甲辰以後皆署喜荀其一通云江浙人文甲於天下近儒學業度越元明欲藏書奎文閣或置之蘇門百泉招徠天下書賈廣求異書以垂後世又一通後附訪求書目自宋刻經史以逮近儒撰述凡數十種又一通欲求顧澗翁思適齋筆記爲之流傳

畫蘭竊坳騷人集賒米能開寒士顏揮手兼金等閒事酒杯一擲剎那間 金德輿鄂巖

昭代名人小傳金德輿字鶴年號雲莊又號鄂巖桐鄉人官刑部主事善書精鑒藏有桐華館詩鈔 嘉興府志雲莊檀從孫七歲能詩乾隆庚子 聖駕南巡進宋槧書籍 賜文綺補刑部奉天司主事校正東觀漢記諸書八種名曰史翼刊以行世 楊蟠文瑞樓書目序金明經星軺文瑞樓書目鈔自明經從孫鄂巖比部爲桐華館訂正之本比部博雅好古可繼明經之流風 士禮居題跋記離騷集傳宋本孫延跋云桐鄉金氏所藏卷端畫蘭一幀方檮盒筆檮盒舍於金氏桐華館主賓相契脫略形迹綴此數筆其殆同心之契歟 錢儀吉跋方蘭坻墨筍卷方處士時館金比部鄂巖華及堂今四十年矣處士

真筆日抄卽華及之圖書彝鼎亦皆煙雲四散 李貽德
六哀詩金鄂嚴比部一首兩峯高高避債臺歲暮逼人西
湖來徧借金錢給寒士春風仍使梅花開未提手揮十四
萬廣廈無際生平願死後盡發篋中藏百二十紙賒米券
鮑廷博悼鄂嚴詩誓向西湖畢此生無端一語我心驚
老輕書畫兼金值死避窮愁兩字名詩卷新排甯有意酒
杯笑擲已無聲電光石火須臾景除是斜陽寫得成自注
云藏弄書畫法帖數千金晚年脫手散去不計值也又云
方與余晚酌燭未見跋把杯一笑而逝

短巷東趨積水潭古梅花下結詩龕一心供養詩千卷莫作
維摩古佛參 法式善開文

先正事略先生名法式善字開文號時帆蒙古正黃旗人
乾隆四十五年進士官侍讀自登仕版卽以研求文獻宏
獎風流爲己任在詞館著清祕述聞槐廳筆記在成均著
備遺錄所居在厚載門北明西涯李文正公畏吾村舊址
也有詩龕及梧門書屋藏書數萬卷詩竹數百本寒聲疏
影翛然如在巖壑間 翁方綱陶廬雜錄序法式善梧門
撰梧門姓孟氏內府包衣蒙古世家原名運昌以與關帝
號音相近 詔改法式善法者國語奮勉也 又云
梧門刻意爲詩多蓄古今人集以詩龕題其書室又以陶
廬自號 又跋梅磻詩話宋末吳興韋居安撰厲樊榭云
全集不傳僅於天一閣借鈔此冊世閒知者罕矣今歸梧

門詩龕 陶廬雜錄十年前余正月游廠於廟市書攤買
宋明實錄一大捆雖不全之書究屬祕本未及檢閱爲友
人攜去至今悔之又得宋元人各集皆永樂大典中采入
四庫者宋集三十二種統計八百二十三卷外附廬山集
五卷元董嗣杲撰英溪集一卷不著撰者姓氏書寫不工
似未及校對之本余惟物少見珍什襲藏之有人許易二
千金靳弗予也 王芑孫題法時帆員外詩龕圖鳳城北
出橫一衢短巷曲折從東趨巷側板扉君所居入門而左
潔埽治瓦屋數楹花幾枝不龕古佛龕以詩 聽松廬詩
話但有梅花看何妨長閉門地偏車馬少春近雪霜溫老
剩書藏篋貧餘酒在樽說詩三兩客往往坐鐙昏此梧門

學士詩也蕭寥澄澹如見其人

水濱豪奪悵彭咸萬卷歸裝壓布帆一榭五松相對峙名山
占盡積書巖 孫星衍伯淵

阮文達山東糧道孫君傳君諱星衍字淵如江蘇陽湖人
父勳河曲知縣君乾隆丁未一甲第二賜進士及第授編
修散館改主事官至山東督糧道勤於著述性好聚書聞
人家藏有善本借鈔無虛日金石文字搨本古鼎彝書畫
靡不攷其源委有孫氏家藏書目內編四卷外編三卷
姚鼐題淵如觀察萬卷歸裝圖詩自興雕板易鈔胥市冊
雖多亂魯魚君自石渠繙七略復依官閣惜三餘世推列
架皆精本我願連牆借讀書政恐衡山承召起牙籤三萬

又隨車 陳宗彝廉石居藏書序丙申二月訪陽湖孫公
于竹庖於五松園假歸廉石居藏書記一卷爲其先淵如
先生遺書也先生官山東糧儲時有平津館鑒藏書籍記
四卷此題廉石居五松園額也曩偕陽城張公子小餘觀
冶城山館樓上藏書五楹冊首各有手書題記今竹庖昆
仲分藏虎邱一樹園金陵五松祠閒有散佚 昌熾案廉
石居藏書志會稽章氏刊入式訓堂叢書平津館鑒藏書
籍記三卷續編一卷補遺一卷李木齋同年刊於廣陵祠
堂書目先生自刊入岱南閣叢書余見元本顏氏家訓有
先生跋云過南陽湖舟覆書數十籠俱沈濕顧千里告予
何義門家藏書亦皆沈水此有義門跋蓋兩經水厄矣其

藏印曰東方廉使曰東魯觀警使者曰孫忠愍侯祠堂藏
書

乞得神仙三字靈上清丹竈共延齡文章太守清寒甚那有
三閒柏木廳 張敦仁古餘 張繼

顧廣圻與古樓記陽城張觀察古餘早年成進士仕宦五
十載其居官也不激不隨進未有不難退未有不異階級
方轉而懸車蹈禮其立身之古也百行備修恂恂訥訥不
買名聲於天下而聞然日章其爲學之古也高明廣大無
所不通老而不肯廢書自佚儒行之篇不云乎儒有今人
與居古人與稽今世行之後世以爲楷先生有焉斯樓之
所以名也樓在先生僑居秣陵之中正街宅東北隅云

彭兆蓀揚州郡齋雜詩維揚劇郡雄財賦太守清寒似我
曹絕學九章都探徧只輸能吏算錢刀牙籤壓架萬琳琅
官閣新開六一堂我有貪心同脈望神仙三字要分嘗自
注古餘太守藏書最富於郡廨東偏葺六一堂奉歐陽公
象而儲圖籍其中設小史掌之何紹基金陵雜述詩古
餘張子舊庭階瑜珥瑤環韻自佳插架遺書多易米芬留
翠墨在吾齋自注每到張家書聲盈耳然遺書盡散吾得
其金石拓數種又貞白燒丹有舊邱張郎觴咏劇風流
三閒柏木廳猶在可惜藏書轉角樓自注陶谷主人張徵
齋藏書甚富今餘柏木廳址楹書隅錄影宋鈔儀禮要
義有張敦仁讀過文章太守二朱記昌熾案其藏書印又

曰陽城張氏省訓堂經籍記

開函再拜瞻遺象辛苦求書鬢已霜吳越浮家津逮舫宋元
插架士鄉堂

陳鱣仲魚

杭郡詩輯陳鱣字仲魚號簡莊海寧人璘子嘉慶丙辰舉
孝廉方正戊午舉人注云簡莊營別業於硤川之果園在
紫微山麓購藏宋雕元槧及近世罕見本甚夥管庭芬
經籍跋文書後吾鄉陳簡莊徵君生平專心訓詁之學嘗
與錢竹汀宮詹翁覃溪閣學段懋堂大令抽甲庫之祕質
疑問難以爲樂晚客吳門聞黃蕘圃百宋一廬九經三傳
各藏異本于是欣然定交互攜宋鈔元刻往復易校疏其
異同精審確鑿其功與攷定石經無以異暮年歸隱紫薇

講舍手自鈔撮成書凡十有九篇署曰經籍跋文 東湖
叢記吾鄉陳仲魚徵君向山閣藏書大半歸馬二槎上舍
其藏書印記云得此書費辛苦後之人其鑒我又刻仲魚
圖象鈐於上 士禮居題跋記萃古齋送來吳志二十卷
專刻本明日訪友城西出金閶門至海甯陳仲魚寓中出
此相賞并告以欲往山塘書肆遂借仲魚舟同往其船有
一小槎曰津逮舫余謂仲魚曰君好書故所乘舟以是名
之今遇借此訪書則若豫知有是事也我兩人不覺掀髯
而笑 吳壽暘過簡莊徵君紫薇講舍詩背倚蒼厓各一
閒雲生北牖抹煙鬟放翁詩句堪移贈買宅錢多爲見山
新坡舊業本黃岡卷軸丹鉛說士鄉重繼白公吟眺地紫

薇花下讀書堂注云士鄉堂先生現上藏書處昌熾案先
生南部新書跋自署新坡陳鱣記於六十四硯齋又案先
生歿於丁丑二月見黃蕘圃卻掃編跋

老罷當道貉子踰眼光一睽窮八荒已有神囂嶠外接何論

與羽及鍊倉 翁廣平海琛

蘇州府志人物傳吳江翁廣平字海琛平望人府學生性
喜異書手自鈔錄不倦道光元年舉孝廉方正卒年八十
二 姚鼐聽鶯居文鈔序吳江翁子海琛安貧力學之士
也撰吾妻鏡補三十卷金石集錄續松陵文獻各若干卷
聽鶯居文鈔三十卷 唐仲冕聽鶯居文鈔題詞瘦蛟舞
浪魚兒藏老罷當道貉子踰足跡所踵出六合眼光一睽

窮八荒日往月來不可遍獨向溟底攬合璧蛟宮蟹樓不可招獨從嶠外接神囂 聽鶯居文鈔此靜坐齋書日序彭桐橋先生見善本書必傾囊典衣購之當幕游數千里外必挾書以出所得幕俸必購書以歸於是陸則汗牛馬水則滯舟楫行旅之費倍於他人比抵家而游囊無幾矣如是三十餘年積書數萬冊乃築此靜坐齋以藏之齋三楹南向北向者亦三楹齋之後層樓三楹以 國朝

御製

欽定

御批諸書藏於樓之中央

樓之東西兩楹凡各家校刊之十三經與夫歷代經解五經總義四書小學之類皆貯焉齋之中則歷代諸子凡儒家墨家醫家兵農家刑法家與夫天文算法術數譜錄小

說之類皆貯焉北向三楹則歷代正集別集總集與夫詩文評選詞曲評選之類皆貯焉登斯齋者如訪西陽之逸典如發宛委之遺文如紬金匱石室之藏如採天祿蘭臺之祕展閱之下不禁有觀止之歎也余生平亦同此好收藏既少又不能多攜行篋在旅館中必借觀於友人而桐橋又喜借人觀因數至其齋或檢某書或檢某故事桐橋令其諸子曰在某架某部第幾冊第幾卷不差毫髮蓋桐橋之書皆親自校訂丹黃並下故能熟記若此至其裝潢之製每冊厚過寸餘每冊之跟自書精楷以表之繙閱既久一無所損覺鄴侯溫公不得專美於前矣庚辰歲編成書目四冊問序於余余謂桐橋不獨務博覽工辭翰已也

其於兄弟互相友愛教子以義方故諸子有聲祭酒布衣
諸生閒他日所就其可諒乎是則桐橋能享此天倫之樂
者足徵燕翼貽謀之善抑亦詩書之遺澤有以致之也
酒誥無爲歎俄空斷爛不全亦足重此非讐言君所言誰謂
古書非骨董嚴可均鐵橋

鐵橋漫稿書葛香士林屋藏書圖後余家貧不能多聚書
願自周秦漢以逮北宋苟爲撰述之所必需亦略皆有之
南宋以下寥寥焉非不欲也力不足也四十年來南游嶺
海北出塞垣遇希有之本必倩精寫或肯售卽典衣不吝
今插架僅二萬卷不全不備以檢近代諸家書目如世善
堂天一閣萬卷樓世學樓傳是樓曝書亭及同時同好如

魯孔氏閩張氏漢陽葉氏陽湖孫氏績溪方氏以至石刻
之本異國之本道釋之藏彼有而余無者多矣彼無而余
有者亦不少也黃氏丕烈聚書多宋本余與久交不敢效
之書非骨董未得宋本得校宋本足供譔述可耳 又書
宋本北周書後宋監本大板厚紙有漫漶損缺處非余所
愛重者偶檢賀蘭祥傳其篇末多出今本六十餘字書貴
宋元本者非但古色古香閱之爽心豁目也即使爛壞不
全魯魚彌望亦仍有絕佳處略讀始能知之

得書圖共祭書詩但見咸宜絕妙詞翁不死時書不死似魔
似佞又如癡黃丕烈紹甫

同治蘇州府志黃丕烈字紹武乾隆戊申舉人喜藏書購

得宋刻百餘種學士顧純顏其室曰百宋一廬 王芑孫
黃蕘圃陶陶室記同年黃蕘圃得虞山毛氏藏北宋本陶
詩繼又得南宋本湯氏注陶詩不勝喜名其居曰陶陶室
飲余酒屬余爲記余未及爲也後二年又得南宋本施顧
兩家注東坡和陶詩於是復飲蕘圃家而卒爲之記曰今
天下好宋板書未有如蕘圃者也蕘圃非惟好之實能讀
之於其板本之後先篇第之多寡音訓之異同字畫之增
損及其授受源流繙摹本末下至行幅之疏密廣狹裝綴
之精粗做好莫不心營目識條分縷析積晦明風雨之勤
奪飲食男女之欲以沉冥其中蕘圃亦時自笑也故嘗自
號佞宋主人云今者訛趣於陶陶非獨喜其宋本之不一

而足也蓋蕘圃宜爲縣而不爲略似陶公其力耕校書又
大致彷彿故因以自寓焉然陶公處衰季求官於貴族濡
足焉而後去之蕘圃遭逢盛際以高材久次隨輩獲選不
由求請顧且灑然脫屣歸臥不出斯其遇遠勝陶公又陶
公讀書不求甚解蕘圃則實事求是蒐亡剔隱一言一句
鑒別古人所未到時以筆諸書而廣其副嘉惠方來蕘圃
讀書之專且博亦非陶公所及也然則蕘圃之命其室與
虞伯生諸賢之命其室者取義不同而蕘圃之趣遠矣蕘
圃年未老宋板之書屬至未已家雖不豐力能致酒春秋
佳日招其二三同好盤桓乎是室臚列宋元校量完闕整
正舛錯標舉湮沈當其得意流爲篇什以視陶公當日所

謂款然良對者未知同邪異也余生平讀書第取有字不能如蕘圃之精求好寫今茲晚晚墮學無復可言然蕘圃既託趣乎陶陶矣誠欲廢由房之唱而極舞詠之情其能舍余哉爲記之如此 沈士元祭書圖說黃君紹甫家多藏書自嘉慶辛酉至辛未歲常祭書於讀未見書齋後頗止丙子除夕又祭於士禮居前後皆爲之圖夫祭之爲典且鉅博矣世傳唐賈島於歲終舉一年所得詩祭之未聞有祭書者祭之自紹甫始 顧千里士禮居祭書詩歸家倏忽歲將除折簡頻邀共祭書君作主人真不忝我稱同志幸非虛儀文底用矜能創故事還應永率初更願齊刊刊舍奠每陪酌酒與羞蔬 又復翁詩一首卅六韻復翁

復生書不死遠信初聞雜驚喜歸來見面爲我泣益信於翁是知已翁言病中前後事卅日昏昏臥牀第薄寒中人疑慙崇季咸奔走煩禱祀溫涼補瀉錯投藥坐覺增劇乏良已瀕危者再再尤甚竟比焦原託垂趾親戚相與興謗訕謂翁致此別有以虛空有物曰造物其所深忌在書史滿家每詫希世珍一一均堪顛跋使更蘇勿藥神助之此論紛紛罔少止特勞然否就我訊據牀走筆付雙鯉我聞斯言細忖度辨說蓋失其當矣死生有命語則云與書曷啻風馬似前歲某甲委盛年一丁不識至癡伯昨歲某乙化奄忽終身甯離菟園裏翁獨安穩出風波巨海崩騰屹山峙苦翁者醫愈翁命唯翁自審徹終始況乎翁之不合

盡爲書功臣最足恃古人地下倘有靈慧命攸寄宜降祉
方今學子多鄙夫但向細繚求利市卜兆從卻儂句僭銛
錐鑽破俗物李牛頭馬脯工借題強韻那惜識者恥翁讀
未見根性命消融名利同渣滓須知超邁流俗外只此相
歧千萬里抱殘守闕碩果存殆可剝九一文擬陽無絕本
三聖義莫斷書中真種子果爾黃鍾律乍調見天地心霍
然起嗟我夙昔發奢願抉真抑僞思料理哀傷吾道多榛
蕪誰解墾闢施覃耜遂乃憂心愠羣小幾欲見殺累切齒
未填溝壑尙假年奚必河清壽難俟從來萬事命也歟庸
鬼庸人等妄耳作詩贈翁翁聽取曩我稱翁作奇士今者
弗死豈偶焉放佚羣編待統紀翁能傳書書傳翁千秋不

朽靡涯埃復哉復哉無恙耶肯任百年駒隙駛 瞿中溶
古泉山館集題黃蕘夫祭書第二圖祭書圖作後先論妙
繪同逢道子孫歎我風塵淪落久奇書空向篋中存注云
前圖吳竹虛作此圖吳枚庵作浪仙嘉話古來無周墨黃
書接步趨我有癡情同是癖也思補畫祭錢圖煙雲聚散
本無常祇合流傳在四方但得主人真好古校讎刊布似
黃郎注云時蕘夫藏書已多轉歸他姓 又嘉平廿又三
日黃蕘圃移居懸橋巷出新詩與圖見示因題四首祀竈
匆匆逼歲除有人於此賦移居披圖莫認村夫子曾讀人
閒未見書舊治東偏古寺西平江一權接葑溪滿船載去
書千卷入室先教插架齊一徙楓橋一懸橋良朋從此路

迢遙丁甯倘有奇書獲共賞還來折簡招滯我吳閭廿載
多身如幕燕不成窠練邠久有歸耕願無計移家喚奈何
昌熾案乾嘉以來藏書家當以先生爲一大宗當時顧
千里爲作百宋一廬賦近潘文勤師刻士禮居藏書題跋
記六卷及門江建霞太史又刻續錄二卷訪百宋遺聞者
此其淵藪矣先生得一奇書往往繪圖徵詩有得書圖續
得書圖再續得書圖今皆散逸其名之可攷者曰襄陽月
夜圖得宋刻孟浩然詩作也曰三徑就荒圖得三謝詩作
也曰蝸廬松竹圖得北山小集作也余所見元機詩思圖
爲得咸宜女郎詩而作也其所輯所見古書錄亦無傳惟
自序兩言云編殘簡斷市希駿骨之來墨做紙渝窺胡豹

班之見見元統元年進士題名錄跋先生號蕘圃或題蕘
夫亦曰老蕘乙丑病瘳自署復翁亦曰復初氏亦曰復見
心翁陳拙安爲鐫一陽更生印又號廿止醒人五十後號
知非子晚年又自號抱守老人其藏書之印曰百宋一廬
曰讀未見書齋曰陶陶室其藏詞曲之所曰學山海居又
間有署紅椒山館學耕堂者不能枚舉也 又按廿止醒
人初不得其義既見士禮居題跋續錄內老學菴筆記兩
跋皆自署廿止醒人後又繫一跋云廿止醒人之自號蓋
余取淵明詩意淵明詩止酒一章廿句有廿止字止酒
則醒矣余自甲寅丁外艱乙卯遭火災遂至日蹙一日二
十年來夢夢今醒矣殆將自止矣淵明詩本有廿止字而

今適當廿年非前定耶乙亥端陽前四日

一留湖上一江湄鷺嶺藏書許共窺欲到建安眞洞府選樓

高處有雙碑

阮文達元

先正事略儀徵相國名元姓阮氏字伯元號雲臺乾隆五十四年進士子常生官清河道前卒福平涼知府祜舉人官知府昌熾案祜字叔錫文達靈隱書藏記嘉慶十四年杭州刻朱文正公翁覃溪先生法時帆先生諸集覃溪寓書於紫陽院長石琢堂曰復初齋集爲我置一部於靈隱元與諸君子議曰史遷之書藏之名山副在京師白少傅分藏其集於東林諸寺孫洙得古文苑於佛龕皆因寬閒遠僻之地可傳久也今盍使凡願以其所著所刊所寫

所藏之書藏靈隱者皆哀之其爲藏也大矣乃於大悲閣後造木廚以唐人鷺嶺鬱峩詩字編爲號送雲林寺玉峯偶然二僧簿錄管鑰之又焦山書藏記嘉慶十八年春元轉漕於揚子江口焦山詩僧借庵巨超翠屏洲詩人王柳村豫來瓜洲舟次論詩之暇及藏書事遂議於焦山亦立書藏以瘞鶴銘相此胎禽七十四字編號屬借庵簿錄管鑰一如靈隱韓崇爲妙詮和尚題焦山曝書圖詩序儀徵阮相國立書藏於焦山妙詮收掌曬晾三十餘年不懈益勤屬几谷和尚繪暴書圖同人題詠焉詩云焦仙高隱處雲海盪心目中有積書巖瑤函謹編錄山僧叢收掌不使塵手觸春秋佳日多時向晴曦曝浩浩海風來芸

香吹滿屋左右青琅玕翠陰覆玉軸繪圖索題句展閱散
古馥何日寄禪關十年快披讀 李黼平小瑯環仙館圖
詩司空博物冠今古聞自建安游洞府奇書天與特寓言
三十輛車人所睹羽陵嵩少自世閒宛委況自君家山但
然松節縛麻炬是身到處皆瑯環 文達南宋淳熙貴池
尤本文選序元昔但得元張伯顏明晉府諸本卽以爲祕
冊嘉慶丁卯始從昭文吳氏易得南宋尤延之本爲無上
古冊矣元家居揚州舊城文樓巷卽隋曹憲故里李崇賢
所由傳文選學者也元旣構文選樓於家廟旁繼得此冊
藏之樓中別爲校勘記以貽學者 又題家藏延熹華嶽
廟碑詩我今快得四明本玉軸綈囊示尊顯豐全范錢三

百年入我樓中作文選 昌熾案余所見宋刻金石錄文
達藏本有印曰癸巳曰節性齋曰文選樓口石墨書樓曰
雷塘盦主曰亮功錫祐曰體仁閣大學士曰隋文選樓之
印曰泰華雙碑之館曰五雲多處是三台曰家住揚州文
選樓隋曹憲故里其內府校書一印曰臣元奉勅審釋內
府金石文字又一方印其文曰揚州阮伯元氏藏書處曰
瑯環仙館藏金石處曰積古齋藏研處曰譜研齋著書處
曰孳經室又有關里阮孔經樓孔子七十三代長孫女諸
印則文達繼配衍聖公女孔夫人也夫人著有唐宋舊經
樓彙世號經樓夫人又有靜春居士阮劉書之二印文達
集中屢有示書之詩當是其侍姬也

山陽笛韻不勝酸紅蕙飄零骨未寒語到青箱靈鬼哭祇留
佳壻比韋寬 袁廷禱又愷 貝傭簡香

湖海詩傳袁廷禱字又凱號綬階吳縣人監生 同治蘇
州府志廷禱更名廷壽六歲而孤生母韓教之成立家有
竹柏樓韓所居也 王昶漁隱小圃記袁子又愷漁隱小
圃先爲王岡齡居名江村山齋又愷之兄岡齡女夫也故
是圃歸袁氏又愷拓而新之入門貞節堂三楹後爲竹柏
樓蓋奉母韓太夫人而竹柏所以況其節也 錢大昕五
研樓記袁子又愷向居金昌亭畔題其讀書之室曰三研
齋三研皆其先世所貽一爲介隱先生物一爲謝湖草堂
研則尙之先生物一爲列岫樓研則永之先生物也丁巳

歲青浦王侍郎以所藏清容居士研贈又愷錢唐奚鐵生
爲作歸研圖未幾又得谷虛先生廉石研并前所藏而五
是夏又愷移歸楓橋舊居謀藏書之所惟茲樓宜乃奉先
世手澤及古今載籍收藏惟謹名其樓曰五研暇日坐樓
中甲乙校讎丹黃不去手 漢學師承記袁上舍壽階明
六俊之後五研樓蓄書萬卷皆宋槧元刻祕笈精鈔又得
洞庭山徐尙書健庵留植於金氏聽濤閣下之紅蕙種之
階前名其室曰紅蕙山房四方名流莫不拏舟過訪壽階
性好讀書不治生產坐是中落奔走江浙間死年四十有
七 聽秋聲館詞話袁綬階性吝一介不輕與聞龍雨樵
謫戍袁湘湄典質所有集二百金以贈咋舌曰是獨不畏

寒餓乃身歿未久子若孫弗克負荷田廬斥買殆盡元和
顧澗蘋過其故居感賦月下笛云試問樓中身前肯信破
家如此又云魂歸白晝常聞哭想只戀青箱未死昌熾案
綬階子爲蕘圃之壻蕘翁此山詩集得諸五研樓賦二絕
志感云漫說收藏五研樓人亡人得已堪憂而今樓在人
何在手觸遺編涕泗流白隄蕭瑟起悲風又見楓江老去
同從此城西蹤跡少僅存水月一衰翁山陽笛韻可謂嗚
咽者已 紅蕙山房吟藁題貝壻簡香味書圖嗜好由天
性詩書豈厭多一編可陶養千卷恣研摩餘興搜金石間
情託詠歌酸鹹與世別莫訝笑殊科昌熾案貝名壻字旣
勤有千墨奩著錄甚富同治蘇州府志壻亦好藏書好金

石書畫略與廷禱相似以嗜古不事生產貧其家持靜齋
書日續疑年錄四卷貝氏友漢居鈔本有礪香居士平江
貝氏文苑諸印

賓客淮南比小山玉臺濡染到慈鬢空談龍脯終揮斥陸賈
裝空合赧顏 秦恩復敦夫 江藩子屏

先正事略秦恩復字敦夫一字澹生江都人乾隆丁未進
士官編修讀書好古所居玉笥仙館蓄書萬卷丹鉛不去
手校刊陶宏景鬼谷子注盧重元列子注及隸韻諸書昌
熾案秦氏所刊尙有李軌楊子注奉天錄唐駱賓王李元
賓呂衡州諸集享帚精舍詞學叢書 顧廣圻石研齋書
目序廣圻今年獲識敦夫先生入石研齋觀所藏祕笈并

示以新編書目上下二卷尋覽既周歎其體製之善也蓋
由宋以降板刻眾矣同是一書用較異本無弗覓若徑庭
者每見藏書家目錄經某書史某書云云而某書之何本
漫爾不可別識今先生此目創爲一格各以入錄之本詳
註於下既使讀者於開卷間目瞭心通而據以考信遂不
啻燭照數計於是知先生深究錄略得其變通隨事立例
惟精惟當也 又江都秦太史姬人端木氏墓志銘公名
之曰守柔字之曰慈鬢玉臺或列奇書金屋每張寶繪纔
經濡染卽若肄爛 江藩石研齋書目序敦夫太史樂志
鉛黃棲神典籍蓄書數萬卷日夕檢校一字之誤必求善
本是正竊怪近日士大夫藏書以多爲貴不論坊刻惡鈔

皆束以金繩管以玉軸終身不寓目焉夫欲讀書所以蓄
書蓄而不讀雖珍若驪珠何異空談龍肉哉若太史之兀
兀窮年蓋亦尠矣又云藩昔年聚書與太史相埒乾隆乙
亥丙子頻遭喪荒以之易米書倉一空自我得之自我失
之夫復何恨然師丹未老強半遺忘所棄祕笈至有不能
舉其名惜未編目錄以誌之也 吳嵩梁香蘇山館集江
子屏藏善本書甚多歲歉持用易米念之心惻自記以文
屬爲賦詩藏書八萬卷讀書三十年躬耕無一畝賣文無
一錢吾儕抱書死亦得忍令儒林少顏色高堂况有垂白
親負米窮途感晨夕元鈔宋槧連籤厨全家不飽惟自娛
一朝割愛換升斗十年感舊增欷歔 阮文達高密遺書

序甘泉江鄭堂子屏嘉慶初入京師子薦館王韓城師相
家終落魄歸饑驅至嶺南余延纂廣東通志書成歸揚州
子屏隨手揮霍雖有陸賈裝無益也其師余仲林爲惠松
厓先生之弟子曾館子屏家

與花同好月同明修到雙芙有幾生薰沐爲書題佛號生生
世世出秦阮

張燮子和

子蓉鏡芙川

姚晚真

蘇州府志張應曾字若谷昭文人蒲江知縣子燮字子和
乾隆癸丑進士歷官甯紹台兵備道以詞章名世 士禮
居題跋記永嘉四靈詩昭文同年張子和藏書也余與子
和相得以彼此藏書故猶憶癸丑同上春官邸寓各近琉
璃廠每於暇日卽徧游書肆恣覽古籍一時有兩書淫之

曰 又題明秀集詩琉璃廠裏兩書淫蕘友蕘翁是素心
我羨小娜環福地子孫世守到于今道光四年甲申蕘翁
爲芙川世講書於百宋一廬昌熾案小娜環福地張氏藏
書處芙川名蓉鏡燮之子娶姚氏名晚真號芙初女史亦
精鑒別故其夫婦藏書印曰雙芙閣余見宋刊後村詩集
殘本有芙初詩云墨林萬卷劫灰餘古本流傳此絕稀八
十詩翁高格調伊川擊壤想依稀茗薰香繡嬾拈芸編
珍重展瑤籤好花明月原無主自取猩紅小印鈐又題云
道光戊子二月花朝琴川女士姚晚真芙初氏時年二十
六歲清寒淒雨病榻淹纏腕弱字劣不計工拙也無虛佳
日而已又有方若蘅跋云道光庚寅上巳桐城女士方若

菡叔芷氏假讀於鏡清閣時盆梅尙未全落靜對古編覺
幽香與墨香同耐人尋味也若菡爲勤襄公之女自號晚
芳女士 莫氏經眼錄云蜀大字本史記集解芙初女史
藏本亦有勤襄公五女若菡二印蓋當時兩家閨秀一瓶
往還洵然脂之佳話已 鐵琴銅劍樓書目宋本擊壤集
芙川藏書卷三冊首空葉有芙川以血書南無阿彌陀佛
六字題其後云乙巳十一日得之愛不能釋以血書佛字
於空葉惟願流傳永久無水火蟲食之災 張氏藏書印
記纍纍不減項子京曰虞山張氏曰琴川張氏曰清河伯
子曰蘿摩亭長曰張氏圖籍曰芙川鑑定曰曾藏張蓉鏡
家曰芙川張蓉鏡心賞曰虞山張蓉鏡鑒藏曰虞山張蓉

鏡鑒定宋刻善本曰小嫻嬛福地曰小嫻嬛清祕張氏收
藏曰在處有神物護持又曰一種心勤是讀書則芙初女
史印也

浮江一舸下錢唐回首昌平是壻鄉綺障未銷書有癖空求

靈藥爲醫狂

何元錫敬社

錢大昕何桐蓀墓志銘君諱季堂字山甫一字桐蓀先世
自上虞遷於杭生四子元錫候選縣主簿 杭郡詩輯何
元錫字夢華錢塘監生有秋神閣詩鈔注云夢華精於簿
錄之學家多善本嗜古成癖素有狂疾姬人媚蘭故大家
青衣也夢華嬖之吳江郭麐懷夢華詩云如願拌償十斛
珠牙籤圍住萬蟬魚莫言狂疾無靈藥新得佳人未見書

後游粵中客死 王槐秋鴻館十二人詩何主簿元錫云
夢華有奇癖兀作書中蟬紫文窮石室祕簡搜瑤函披覽
手著錄沐髮不及簪忽聞有清閣一舸浮江潭直以性命
博豈止耳目貪歸來笑開口竟忘罄瓶甌讀君借書圖技
癢心懷慙他日一瓶致不爾梁閒探 張鑑訪書圖歌爲
何夢華索賦夫君好古耽冥搜南探禹穴東之罕手拓金
石不知數口吟詞翰無與儔絳雲樓中焚未失化鹿寺邊
竊還出一千金購吳都文八萬卷充長水宅日思誤字相
貫穿手定黃墨窮鑽研涼州太守車幾兩織簾居士手一
編笑吾銜薑亦好事縱不能訪頗爲累夜讌偷鈔述古堂
朝游市閱慈恩寺憶昔渡江至揚州吾師招住文選樓連

林照軫那可說手胈口沫無時休此時何君日來往臨淄
嚴安亦同賞廣集甯論翡翠裘搜尋不類珊瑚網 養新
錄孔氏祖庭廣記十二卷何夢華所藏紙墨古雅昌熾案
是書今藏海虞瞿氏有瞿木夫題云辛酉四月二十三日
觀于何夢華三吾鴻景齋中又黃蕘翁題云令夏五月余
白都門歸錢塘何夢華亦自曲阜攜眷屬僑寓於吳何固
孔氏壻也其匱贈中有元板孔氏祖庭廣記五冊裝潢古
雅籤題似元人筆 拜經樓藏書題跋記鐘鼎欵識爲何
夢華借閱有題字云嘉慶庚午觀于護經堂之蜨影園
鐵琴銅劍樓書目九經疑難有錢塘何元錫字敬祉號夢
華又號蜨隱朱記昌熾案據此則蜨影之影疑當作隱

回首秦淮攬袂時
停車腹痛悵臨歧
阿和阿道皆無恙
著錄還當問一瓿

顧之達抱沖

顧廣圻撫本禮記鄭注攷異序從兄抱沖名之達元和廩貢生歿於丁巳春年四十五黃丕烈蘆浦筆記跋過學山堂見亡友顧抱沖手閱汪文盛本漢書著筆不多想未經卒業之本流落坊閒忽過余眼倍增懷舊之思矣抱沖之歿其二子皆髫齡今皆成人昌熾案澗蘋跋高注戰國策有云留示阿和阿道卽其二子小名也又案蕘翁跋和靖詩謂抱沖歿於四月與澗蘋之言不同當以澗蘋爲正其藏書處曰小讀書堆焦循四哀詩顧之達吳中諸生乙卯遇於秦淮明年至其書室得觀藏書時校刊列女

傳值君病死死數月書方成詩云抱沖奕奕目光照人鶴作形氣書爲性真我識君屋背城面津丹鉛縱橫誦讀不輟誦讀不輟今輟且絕將旅吳聞我欲迂行瞿中溶輓顧抱沖茂才詩嗟嗟顧君好讀書百萬牙籤皆玉軸宋刊元印與明鈔插架堆牀娛心目一握書論一斛珠購來手自三薰沐黃金散盡爲收書祕本時時出老屋又云令弟風流歎阿兄遺書謹守藏家塾徧乞名公作傳銘一瓶和淚重編錄自注抱沖著有一瓶錄

鉛槧終年理董勤
几塵風葉掃績紛
誤書細勘原無誤
安得

陳編盡屬君

顧廣圻澗蘋

李兆洛顧先生墓志銘先生名廣圻字千里以字行號澗

蘋年三十補博士弟子員孫淵如觀察張古愚太守黃堯
圃孝廉胡果泉中丞秦敦夫太史吳山尊學士皆推重先
生延之刻書道光十五年二月十九日卒年七十先生論
古書訛舛處細若毛髮夢如亂絲一經剖析剗然心開而
目明銘曰安得古書盡經君手凡立言者藉君不朽書有
時朽先生不朽 按先生自號思適居士百宋一廛賦注
云居士元和縣學生喜校書皆有依據絕無鑿空其持論
謂凡天下書皆當以不校校之深有取於邢子才日思誤
書更是一適語以之自號云 先生思適齋圖自記史稱
子才不甚校讎子才誠不校乎哉則烏由思其誤又烏由
而有所適也故子才之不校乃其思不校之誤使人思誤

於校者使人不能思去誤於校者而存不校之誤於是日
思之與天下後世樂思者共思之此不校校之所以有取
於子才也 葉廷琯吹網錄遜翁苦口一書節錄朱子語
類錄者爲无悶子不著姓氏程稟初語余无悶子卽其師
顧澗蘋先生 其藏書記曰一雲散人又有陳黃門侍郎
三十五代孫一印

寒霜葛帔孤兒淚香雪梅花處士魂文獻未傳後死責好攜
畫本訪程園

程世銓叔平 張思孝白華


士禮居藏書題跋續錄顧千里爲余言曰有宋刻鑑誠錄
爲程念鞠豪奪去此事已逾二十年矣念鞠祕不示人余
雖識念鞠未便索觀也近念鞠宦游江西家中書籍大半

散佚惟此書尙寶藏余謀諸書賈之素與往來者久而始得見其書索白鏹三十金余愛之甚易以番錢三十三圓書計五十七葉題跋一葉以葉論錢每葉四錢六分宋刻書之貴可云貴甚而余好宋刻書之癡可云癡絕矣時嘉慶九年歲在甲子正月丁巳日 又越歲丙寅一跋云是書千里所得叔平所收今春叔平從江西解餉至江甯旅中病卒千里館於江甯太守許因爲料理喪事令其孤扶柩歸可謂始終篤於情矣昌熾案叔平當爲念鞠之字余同年王勝之太史藏念鞠鄧尉探梅圖卷方蘭坻所繪念鞠自填金縷曲望梅二闕後題云己酉仲夏世銓書於寸草軒中下有銓字方印鞠莪二字朱文方印因知念鞠名

世銓又別號鞠莪也汪雪廬縉題此卷云先太孺人在日最喜游鄧尉而尤愛西磧逸園子兄弟嘗奉太孺人三至其地逸園者程家園也其地絕勝以西磧爲隲以太湖爲池繞於所謂騰嘯臺下以梅花萬池爲林程氏夫婦偕隱於中程氏婦姓顧能詩詞壇中所稱顧香生者與太孺人有好自太孺人見背予亦不復至其地矣念鞠爲太孺人再姪孫出是圖邀題念鞠與予蓋有異而同者 顧廣圻刻易林序廣圻十六七歲時從游於長洲張白華師假館程子念鞠家念鞠旣同門而頗蓄書甚相得也先是念鞠有陸敕先手校本易林後歸黃君蕘圃將謀付刊屬序其簡首回憶初知有是書之日倏忽二十五六寒暑曾不一

瞬而念鞠以薄宦遽化於外廣圻亦復行年四十有三久
見二毛矣方思悉數吾吳人物淵源典籍流派所聞所見
加以筆記存諸篋示我兒曹稍傳文獻之信而蕘圃刻
是書顛末乃可爲其中一事者也昌熾案此書自甲申屬
豪迄今七載粗可寫定犬馬之齒亦適四十有三非敢竊
附前賢亦聊存文獻於什一而已時光緒庚寅客都門記
又案吳豈鳳絳雲樓書目跋云此冊爲張子白華所藏
予嘗借閱張子疑子藏匿不返索還甚急幾至面赤張子
博雅多聞獨於書斤斤護惜古人所謂讀書種子習氣未
除然卽此知張子能謹守勿替者矣據此則白華亦好書
不愧爲淵賞之師者也枚菴印須集張思孝字南陔長洲

人諸生有白華堂詩



痛言五

三

